

Aunke ta duna conseho positivo

CAft ta señala cu aumento di reparatietoeslag por tin efecto den otro area

Manera ta conoci, durante tratamiento di presupuesto nacional di pais Aruba pa 2025, fraccion AVP y Futuro a entrega un amienda cu a cambia e direccion completo di e presupuesto. Door di esaki, presidente di parlamento, Gerlien Croes a tuma decision pa manda e amienda pa e organonan consultivo pa pidi conseho prome cu continua cu e tratamiento di presupuesto. Dia 19 di maart ultimo CAft a manda su conseho pa presidente di parlamento.

Dia 17 di juni 2024 Colegio di Supervision Financiero di Aruba (CAft) a duna su conseho riba e concepto di presupuesto 2025 (OB) di Pais Aruba. Manera ta conoci e dia 11 di februari a entrega e prome nota di cambio pa cu esaki, sigui pa un di dos nota di cambio dia 6 di maart 2025. Diabierna 7 di maart fraccionnan di Partido AVP y Futuro a entrega nan amienda.

Den su conseho CAft ta splica cu despues di aplica tanto memorandum di splicacion como e amienda, Aruba ta presupuesta un surplus di AFL. 176 miyon pa e sector colectivo den año 2025, cu ta 2.2% di e producto interno bruto (GDP). Ademas, un surplus anual tambe lo ser presenta den e periodo 2026-2029.

Esaki ta nifica cu Aruba ta cumpli cu e norma presupu-



estario di e saldo di financiamiento di e sector colectivo di por lo menos 1% di GDP di acuerdo cu e ley di LAft y cu e compensacion di deficit prescribi.

Na mesun momento, CAft ta constata cu e medidanan di maneho proponi ta reduci e alcance presupuestario pa absorbe contratiemponan. Esaki ta reduci e habilidad pa absorbe shocknan externo.

Pa loke ta e surplus di financiamiento, CAft ta splica cu e surplus di e pais ta alcanza 0.8% di GDP, mientras cu e surplus di otro entidadnan di sector publico ta alcanza 1.4% di GDP. CAft ta señala cu esaki lo no genera suficiente surplus pa e pais na 2025 por aloca por lo menos 1% di GDP pa pago di debe.

Incluyendo e surplusnan di e

otro entidadnan, esaki ta garantiza, basta cu e surplusnan aki ta flui pa e pais pa pago di debe. CAft ta remarca cu LAft ta stipula cu henter e surplus presupuesta di e sector colectivo ta ser usa pa reduccion di debe.

P'esey CAft ta recomenda pa mas pronto posibel yega na acuerdonan cu Algemene Ziektekosten Verzekering (AZV) y Banco di Seguro Social (AZV) pa asina e surplusnan di e entidadnan aki por ser usa tambe pa reduccion di debe. Esaki ta den cumplimiento cu e obligacion legal pa mantene un reserva.

CAft ta enfatisa cu si Aruba por usa henter e surplus di e sector colectivo pa reduccion di debe, e pais lo mester fia menos placa y e presion presupuestario di cobransanan di interes, cu ta na 16% di e presupuesto, por ser reduci.

Pa loke ta ta trata proporcion di debe, e organo di supervision ta indica cu e debe di e pais na fin di 2025 ta suma AFL. 5.201 miyon, of 65% di GDP. Di acuerdo cu e principianan tocante crecimiento economico y pago anual di debe nominal, e cuota di debe lo baha te na 51% na 2029. E presupuesto, despues di ambos nota di cambio y e amienda, ta muestra un desaroyo positivo di e cuota di debe.

Sinembargo. CAft ta señala, e desaroyo aki ta regarda solamente e debe di e pais y no esun di henter e sector colectivo. Ademas, e organo ta agrega, ainda no ta cla kico e composicion precies di e sector colectivo lo ta na 2025, como cu esaki no a ser de-

termina ainda. P'esey CAft no por evalua con e posicion di debe di e sector colectivo lo desaroya riba termino mas largo.

Tocante e medidanan di politica, CAft ta constata cu e maneho nobo – manera inclui den e presupuesto, e prome y di dos nota di cambio y e amienda – lo reduci e saldo di financiamiento di e pais cu AFL. 240 miyon compara cu 2024. CAft ta remarca cu aunke esaki ta keda den e cuadro di LAft, e ta nifica tambe cu Aruba ta nabegando mas cerca di biento. Esaki ta limita e espacio pa por absorbe contratiempo, specialmente den caso di shocknan economico.

Mirando e desaroyonan geopolitico actual y e incertidumbre rond di crecimiento economico (global), CAft ta conseha pa sigui mantene cautela den politica presupuestario.

E intensificacionnan, manera e aumento di e reparatietoeslag pa pensionadonan, ta ser cubri parcialmente pa reduccionnan structural den e articulonan di bienes y servicio y gastonan di personal. CAft ta enfatisa cu ta positivo cu (parcialmente) cobertura structural tambe ta ser busca pa intensificacion structural.

CAft ta recorda cu anteriormente a conseha pa reconsidera criticamente e punto di bienes y servicio, mirando e sub-explotacion. Mirando e aumento substancial di e reparatietoeslag, CAft ta recomenda pa ora di otorga e toeslag aki haci un test di entrada, manera ta inclui den e Ordenansa Nacional riba

Reparatietoeslag. Esaki ta contribui na limita e impacto presupuestario di e medida.

Pa loke ta trata inversionnan CAft ta constata cu e presupuesto di inversion pa 2025 lo subi cu AFL. 30 miyon. Con esaki lo ser implementa ainda no ta cla. E organo ta propone pa establece un fondo di inversion, alimenta pa e gastonan di capital di e pais.

Mientras cu ta positivo cu inversionnan ta aumentando, CAft ta constata cu den ausencia di un agenda di inversion di varios año, tin riesgo cu e espacio presupuestario aki na final lo no ser encaha y usa pa gasto di consumidor. Nan ta splica como ehempel, e presupuesto a inclui un aumento gradual di inversionnan te na mas o menos AFL. 140 miyon na 2029. CAft ta constata cu e nivel anual di inversion na 2029 awor ta alcanza AFL. 60 miyon. Den e cuadro aki ta CAft ta recomienda pa entrega un programa di inversion di varios año bon funda na Estadonan di Aruba.

Pro ultimo, den liña cu e conseho riba e presupuesto, CAft ta pidi pa reduci e exigencia di financiamiento pa 2025 door di usa e surplus di henter e sector colectivo. Pa esaki ta importante pa haci acuerdonan mas pronto posibel cu AZV y SVb riba con e surplusnan di e entidadnan aki por ser usa pa e pais pa reduccion di debe, teniendo na cuenta e obligacionnan financiero di AZV y SVb den futuro.

E organo ta pidi tambe pa presenta e desaroyo multi-anual di e debe di henter e sector colectivo den e prome presupuesto complementario pa 2025.

Ademas ta pidi tambe pa den e prome presupuesto complementario pa 2025, presente e desaroyo multianual di gastonan di personal di acuerdo cu e definicion di LAft.

Y por ultimo ta pidi pa yega urgentemente na un agenda di inversion di varios año cu ta alinea cu e capacidad di implementacion di e pais. Control di belasting ta keda mesun importante cu nunca pa sigura cu e espacio presupuestario ta ser realmente usa pa inversionnan riba termino mediano.

